

Jangan kongsi maklumat tidak sahih, selidik dahulu

SINAR HARIAN 11/10/2015



Asyraf Wajdi (kanan) ketika menjawab soalan media.

KUALA NERUS – Umat Islam perlu menunjukkan contoh teladan terbaik dengan tidak menyebarkan sebarang khabar angin atau ber-kongsi maklumat yang belum diketahui kesahihannya kepada orang lain.

Timbalan Menteri di Jabatan Perdana Menteri, Datuk Dr Asyraf Wajdi Dusuki berkata, budaya menyebarkan maklumat palsu dalam kalangan pengguna laman sosial sejak kebelakangan ini agak membimbangkan.

"Malah, sepanjang musim Haji ini, kita dapat banyak berita palsu disebarluaskan dan lebih malang, ia dilakukan sendiri oleh umat Islam, sekali gus mengakibatkan kita terpaksa berdepan cabaran untuk tangani persepsi."

"Justeru, kita melihat perlunya untuk kembali dan hayati prinsip dengan memastikan setiap maklumat yang diperoleh itu, diselidiki dahulu sama ada ia benar atau sebaliknya sebelum menyebarkan kepada pihak lain," katanya.

Beliau berkata demikian

ketika hadir menyempurnakan Seminar al-Quran dan Masyarakat Kontemporari (SQ 2015) anjuran Fakulti Pengajian Kontemporari Islam Universiti Sultan Zainal Abidin (Unisza) di Unisza Kampus Gong Badak, di sini, semalam.

Menurut Asyraf Wajdi, masyarakat terutamanya pengguna laman sosial juga perlu diingatkan supaya jangan cepat membuat andaian atau spekulasi jika menerima sebarang berita atau maklumat yang telah diviralkan.

Sementara itu, mengulas mengenai proses perjalanan

jemaah haji Malaysia sepanjang berada di tanah suci Makkah, Asyraf Wajdi turut memuji kesemua khidmat 585 petugas Tabung Haji dan agensi lain yang terlibat.

"Alhamdulillah, boleh dikatakan segala proses perjalanan kesemua jemaah haji berjalan lancar dan tersusun kerana pihak Tabung Haji telah melakukan pelbagai persediaan rapi."

"Saya juga ucapan terima kasih kepada semua pihak yang terlibat secara langsung untuk melancarkan proses mengerjakan ibadah haji bagi tahun ini," katanya.